

Visoki predstavnik: SIPA dobila međunarodno priznanje

Visoki predstavnik Paddy Ashdown danas je pozdravio odluku Egmont grupe da ponudi članstvo Bosni i Hercegovini. Egmont grupa je svjetski rasprostranjena mreža agencija za provedbu zakona (uz BiH kao novu članicu grupa broji 85 zemalja) koje prikupljaju i razmjenjuju finansijsko-obavještajne podatke o pranju novca. Kriminalne mreže, uključujući organizovani kriminal, ratne zločine i terorističke mreže vrše pranje novca kako bi prikrile porijeklo dobiti koje ostvaruju kroz krivična djela te kako bi dalje unaprijedile finansiranje svojih aktivnosti.

“Poziv za članstvo koji je Egmont grupa uputila BiH pokazatelj je povjerenja koje ova grupa ima u sposobnost Državne agencije za istrage i zaštitu (SIPA) i njen Finansijsko-obavještajni odjel”, rekao je visoki predstavnik, dodavši da ovaj poziv ujedno predstavlja i priznanje “napretka koji je SIPA ostvarila otkada je dobila svoj prošireni mandat prije nešto manje od godinu dana”.

Visoki predstavnik naglasio je kako ovaj poziv odražava i činjenicu da je “SIPA usredsređena na obavljanje policijskog posla i njen mandat je da se fokusira na najteža krivična djela, a ne na politiku”.

Članstvo BiH u ovoj ekskluzivnoj grupi otvoriće mogućnosti za dalje jačanje BiH u nastojanjima da se bori protiv kriminalnih mreža. To će omogućiti Finansijsko-obavještajnom odjelu SIPA-e da proširi i sistematizira razmjenu finansijsko-obavještajnih podataka, da usavrši stručne kapacitete i sposobnosti svojih kadrova, te da njeguje i razvija bolju komunikaciju sa kolegama u drugim zemljama.

Kriminal ne priznaje granice i da bi se efikasno borile protiv

kriminala agencije za provedbu zakona moraju se uhvatiti u koštac sa ovim problemom širom države BiH te se aktivno angažovati u široj, globalnoj borbi. Prijem SIPA-e u Egmont grupu pokazuje da BiH postepeno zauzima svoje mjesto u međunarodnoj borbi protiv kriminala.